

直隸澧州志林卷十六

湖南直隸澧州借補知州同知府事何璘纂

人物志

論人物者輒歸美於山川夫山川終古不易而人物之盛衰迥殊豈所謂孕毓者工於前而拙於後哉蓋教化之興替實司之播黍稷於郊原其致力詳者其收必倍芝草無根醴泉無源和氣之所盪結則嘉徵叠見乃其明驗耳澧地素號多才諸翹然炳彪簡策者或爲境之所產或爲踪之偶托道德勞動政事文章以至偏長薄技皆深人選企况當

直隸澧州志林

卷十六

名賢

一 人物志

國家化累百年太和洋溢窮裔亦洽文明珍祥之畢集尤羣倫樂於自見時乎爰据舊編續補缺漏而闡門尤萬化之原婦人女子中有不爲澆風所移如康氏義不辱賊孫氏孝克祚翁宜亟嘉錄以爲澧女士勸而山川之秀乃以昭鍾嬗於無既類次之爲十四條作人物志第九

名賢

善人國之寶也退則以其行仁一鄉進則以其學匡天

下不近名不立異循循矩度無溺於俗而朝野亦爭重焉斯真賢矣澧雖邊郡共欽楚寶豈乏王孝廉姓名畏告范秀才天下已任者約舉什一是亦南國之紀也

澧州

晉 車胤字武子南平人曾祖浚吳會稽太守父育爲南平太守王胡之主簿胡之避司馬無忌之難置郡澧陰亂方十餘歲隨父在胡之出於籬中見而異之謂育曰此兒當大興卿門胤勤學不倦家貧不常得油夏月則囊螢火以照讀及長美丰姿機警敏悟甚不

直隸澧州志林

卷十六

名賢

二

人物志

鄉曲之譽桓温在荆州辟爲從事深重之遷別駕征西長史時惟胤與吳隱之以寒素博學知名於世每盛宴胤必與曰坐無車公不樂太元中領國子博士會議郊廟明堂事胤以明堂之制難詳且樂主於和禮主於敬故質文不同音器以殊旣茅茨廣廈不一其度何必守其形範而不弘本順時乎九服咸寧四野無虞然後辟雍可光而修之時從其議遷驃騎長史進爵臨湘侯有王國寶者諂於會稽王道子諷入座以道子爲丞相加殊禮胤曰此成王所以尊周公也

今主上當陽豈得爲此稱疾不署帝見疏大怒嘉亂有守詔誅王國寶將軍向緒曰不如殺亂以除時望挾君相舉事亂至不敢害反問計亂使上疏待罪國寶遂自解隆安四年亂遷吏部尚書會稽世子元顯驕恣白道子請禁抑之顯問道子車武子屏人言何事道子曰爾幽我不令與朝士語耶元顯出語其徒曰車亂間我父子逼令自裁俄而亂卒朝廷傷之張宮免按晉史亂爲吳太守浚之孫則浚亦南平郡人而三國吳志無可考豈車氏自他處遷來耶

唐厲國南以員外郎辱盧杞於澧州官終侍御史與

直隸澧州志林

卷十六

名賢

三

人物志

陽朔曹鄴遊有贈答詩

宋范浚字茂明紹興中舉賢良方正昆弟多膺仕獨

以秦檜當國抗節不起隱於香溪著書明道稱香溪先生

明李通字彥明永樂庚子舉人授保寧訓導改任成都

九年考滿例內外官年四十以下得才望補臺省銓察通學優行潔而牒內齒數正與例符將以應選通曰吾年實過於牒縱得美官終身有愧即赴部陳告冢宰嘆曰真古人也遂以常格歷慶都上高教諭

年七十將赴京乞休或勸其移疾免赴通曰奈何無疾而欺竟赴闕具奏詔致仕以孫如圭擢都察院贈右副都御史

李俊永樂庚子舉人授袁州府經歷剛正不阿以大臣薦詔爲監察御史

周禧字永吉景泰庚午鄉貢任福建尤溪知縣長身美儀性嚴毅勤於民事邑用晏然時有指揮某巡六邑怙勢縱漁至尤溪聞水蘖聲獨無犯超陞延平知府李克嗣字士修父吉安四川內江人給事中李蕃孫也

直隸澧州志林

卷十六

名賢

四 人物志

任華府教授遂家於澧克嗣登成化進士選庶常改外多異政至南京巡撫寧庶人稱兵以安慶當賊衝屬都督楊銳死守因是王新建得直搗其穴又治河有功晉工部尚書嘉靖初被詔陳言條八事以聞擢兵部尚書累疏乞歸薦新建伯自代賜乘傳歸澧卒塋於羅湖塏贈太子太保謚康和祿度弘遠雖位顯不設方畛平生清苦惟蓄古書畫臨事果斷以外和故不及禍著有梧山集

毛棠字宗弘治乙丑進士知饒平縣以剛介著名補

風憲時廣東侍御楚人與逆璫隙璫傾其鄉以快忿
因并累焉及白詔還舊職尋卒棠幼穎敏讀書過目不
忘事親孝訓第俱成名著有玉華篇嶺南漫稿

李如圭字國寶弘治己未進士知江西安福縣調建昌
釐弊剔奸盜賊望風逸去按福建貪酷吏無不服栗
引退轉廣西兵備獠獍向化擢都察院值延綏大饑
夏文愍薦爲巡撫疏荒政十餘條得便宜行事全活
數十萬人命總理河道易置閘座引諸湖水益河流
糧運乃假歷晉戶部總督倉塲兼西苑農事世宗詰

直隸澧州志林

卷十六

名賢

五 人物志

顯陵勅同靖遠伯王瑾居守陞工部尚書改戶部致
仕歸圭學期用世嘗於書室大書弘濟艱難四字所
至表章先哲激揚後學御家人無慢容接鄉里不爲
崖岸田園僅給食指先世所遺悉讓諸弟歷仕雖久
止富圖書著有懷古集祀鄉賢

梁寶字士賢弘治己酉舉人任江西貴溪知縣以忤中
貴瑾降縉雲教諭瑾誅陞建始知縣祀鄉賢

汪儉字崇本弘治壬子舉人授成都推官有豐寧二倉
王者虧折至鉅萬莫可詰承檄視事案簿必親一洗

其宿逋又數著禦賊功陞嘉定州鎮守建昌宋監估
恣儉抗色直詞卒折奪之中貴入蜀取佛經所過長
吏皆被斥獨於儉望風斂抑擢梧州府同知致仕家
居孝友彌篤盡以祖產讓弟睦於姻族正室卧病二
十年不納妾侍入城都名宦祠祀鄉賢子端領鄉薦
高鵬字雲翼正德辛未進士知南通州廉能茂著弊政
悉革嘗奏罷楊州坍江糧後調霸州係三輔選地中
貴人漁食其中上章極論觸權璫怒文致逮獄臺省
列劾上雪上直之不坐降雲南安寧同知撫院李宗

直隸澧州志林

卷十六

名賢

六

人志

器抗章論薦曰高鵬爲人和粹而遇事敢爲公論惜
之未幾以公務往蜀便道歸省卒於家鵬性孝友父
堂遇之嚴少拂輒撻受之無少逆一日令跽廳事州
守熊見過不敢起必得父命乃執賓主禮熊歎服以
爲真曾閔幼聘周偉女笄而瘳時已舉孝廉偉辭執
不可竟委禽焉終身相敬卒年三十二劉文肅誄之
曰有君行之直而位不顯於朝寧有廷式之行而祿
不逮於後昆爲鄉善士爲國良臣入揚州名宦祀鄉
賢澧安人物傳好載祀鄉賢名宦及爲立有祠見某
志等語徵信者少若高鵬傳差能不愧

湯時來字應之正德癸酉舉人知江寧縣調貞陽居官清苦不苟依阿櫬歸惟圖書數匣

李樂字新甫克嗣子登嘉靖戊戌進士授中書舍人調工科給事中以戇直峭岸出爲臨江知府廉得郡大豪尤氏不法事竟置諸理又建黃閣元僚坊以表金文靖傳文穆清其沒產以供祀享其著風裁持大體率此類居鄉不妄與縉紳縫掖過從著澧州志祀鄉賢祠

龔天申字子德年十二補諸生潛心理學嘗從趙大洲

直隸澧州志林

卷十六

名賢

七

人物志

及太和胡正甫遊文章德行取重一時領嘉靖乙卯鄉薦萬歷時爲嚴州府同知清聲卓績詳嚴陵志轉兗州開永濟新河便漕運受殊賞築汶上城以黃河堤脆不任障禦築太行堤二百餘里尋卒濟汶間如失慈母詔祀鄉賢

龔銘字新甫萬歷戊子舉人性豪宕以詩酒自雄官大理府同知改永昌府屢與稅璫抗會礦役盜課金見獲璫嗾指大理富民十四人窮追之銘曰此良民安得匿金事置不問璫愈怒遂誣奏銘上知其寃得免

著有雙榆堂詩稿

清 龔之怡字雲石順治壬子拔貢任福建永安縣減
門攤牛牙篁錢諸雜稅建寅賓諸館躬課諸生永民
爲建祠七改官江陰縣民苦旱潦不時於城西開後
港河備蓄洩陰民立祠河濱塑像以祀

易尚陽字方叔事繼母胡至孝初中副車順治辛卯登
賢書家徒壁立無力北上州刺史爲脂其轄遣之就
選西河令縣有山裂爲二中一坪約五里許陷成湖
懸糧五百石里苦賠累陽至泣請上官奏免民爲建
直隸澧州志林 卷十六 名賢 八 人物志
祠祀之

王大業字予未號漁浦康熙己卯舉人個儻多智甫弱
冠以古人自期就選吏部奉 御試長春苑不移時
詩成擢第一授秀水令秀賦重歲例糧總釀百金入
官大業下車汰之折獄有神明號任三月以父憂歸
再補昌化縣地環海風土殊惡或難之公不欲違
君命捧檄卽行邑旱逾半載至卽宿齋宮越四日大
雨乃入署未三月卒於官公生平慷慨好義京師有
急難友生之譽得知交仗助觀乃能歸里所著有燕

遊粵遊關中遊草檣李債餘讀史淨白等卷

安鄉縣

明 劉宣字志公永樂貢生授四川什邡今時有甘彭
衛軍儲之運民苦險峻多斃於途宣爲募諸商有代
完一分於彼地者倍償之且捐俸以勸自是軍民稱便
周秩字公嚙宣德乙卯舉人授四川榮經學訓奏改學
基身督工役遷吉安學諭捐俸修櫺星門尚書楊鼎
稱其才可安邊文堪督學薦於朝時司禮監求賄不
遂遷南昌教授捐造南昌及本籍安鄉兩學祭器極

直隸澧州志林

卷十六

名賢

九 人物志

精堅至今尚存祀南昌名宦安鄉賢祠

彭懋字本修景泰中由歲貢授四川珙縣令邑新附之
民多悍逆前令往往爲所排懋深入險地數月多方
綏柔自是諸土俗洽民情七年無擾及還民有乘筏
涕泣而送者轉叙州別駕卒祀鄉賢

曾槩字待中成化丁酉鄉貢授四川金堂學訓好學不
倦人材多所成就陞國子助教進修職佐郎未幾擢
淮府長史陳三事於朝啟八事於藩皆嘉納焉三事
一曰明體制以專職業二曰遵舊規以息刁訟三曰

禁投克以止遊說八事一曰講學端本二曰申明體
統三曰撫恤軍校四曰禁支軍糧五曰糧役除丁六
曰嚴令買辦七曰分別疆界八曰會問詞訟令祀鄉
賢

清 張孫鉉字殿聲明先孫康熙辛卯副元淡泊溫厚
澧有差基數間當事欲廣育嬰堂捐出不吝試用西
晉歷縣五州二所至獎剔民懷有能聲卒於崞縣官
署纒歸一無長物庶古所稱清白吏者

慈利縣

直隸澧州志林

卷十六

名賢

十一 人物志

明 丁璿字國器弘治壬子舉人在河南府通判歷安
蘭二州知州鞏昌府通判汝州府左長史蘭州志載
璿政事勤法前哲而才足以濟之

皇國彥正德歲貢授會藩長史後陞浙江嘉湖道性純
易清苦自甘未半載乞休家居不見有司不侵鄉里
有古君子風祀鄉賢

安福縣

明 周叙字子厚其先河南息縣人永樂中千戶成化
改隸九谿父璧慶符知縣叙生有異質猿臂善射不

拘小節而博學能文中弘治甲子舉人正德辛未進士授大理寺右評事進左寺丞讞獄關中有欽恤錄武廟南巡率同寅抗疏詔廷杖謫丞永嘉世宗登極錄故諫南巡者超擢韶州知府轉四川按察副使歷叅政山西按察使陝西左右布政使丙申召爲南京都察院右副都御史尋總理宣大戎務入爲大理寺卿戶部侍郎提督太倉改兵部以御虜上功進工部尚書督理沙河大工以董修九廟失事貶侍郎尋以災異自陳致仕居家二十餘年壽八十卒始叙謫

直隸澧州志林

卷十六

名賢

十一 人物志

永嘉張文忠老弗第叙奇其才可大用敬禮甚篤卒引與同升而晚節能自勇退世推重之

翟鏐字景輝正德甲戌進士授丹徒知縣廉潔平易士庶安之卒於任妻子貧不能歸郡大夫爲治喪具

永定縣

明 江存明字晦之衛貢生讀書不事生產家無隔宿儲亦不介意樂道人善敦孝友爲士林軌範知商水縣風采凜凜人不敢干以私卒於任宦橐蕭然商民感之擁襯巷哭至不能行

黃應期由選貢授夔州府通判有廉恕名家居孝友常拾遺金訪其人還之

孝友

百行莫先於孝孝虧而五倫皆無可採魯子論非孝不
必盡關父母之養而無不與孔子所云孝之終始相背
馳故今有覲然士夫絕裾食臠反不若愚夫愚婦之終
養追慕天性常摯者此志於孝行所以不概之名賢特
有紀述孝則必友因附著之若古申鳴始為父之孝子
終為君之忠臣固道有常變然白公殺而父先受刃要
直隸澧州志林

卷十六 孝友

十三 人物志

澧州

周 申鳴以孝聞楚惠王欲相之不赴父曰汝祿於朝
吾死無憾矣遂拜相白公勝作亂殺司馬子期鳴將
往死焉父止之不聽辭而往以兵圍勝勝劫其父懼
鳴鳴曰始吾父之孝子也今吾君之忠臣也遂一戰
而殺白公其父亦死王大賞之鳴曰食祿避難非忠
臣定國殺父非孝子名不能兩立行不能兩全遂自

刎 忠孝雖難兩全初赴難亦當謀所以衛父既被劫更當思所以制白一往而敵父與白俱死刎有餘

疾矣錄之以勸國爾忘家論之以明權無悖經如父實甘死則急戰以成父之忠父或負國不可從逆以重父罪惟有付國事於可任之人已則先死庶朝廷因子忠于君他日或薄宥其父乃稱善權忠孝之變者

元 費孝子

失其名亦未詳何處人

為小卒遭亂失母不相見者

二十年與人言輒流涕嗚咽聞於主將予假令尋母行次澧州城邊得之時至正十年事也為請於朝賜金復其身克終養焉程奕隱贈以詩

明

黃廷偉字國器隆慶貢生有至性父淮早卒一日

忽心動勸母母預事母時濯甕手回旋其中忽巨蛇

直隸澧州志林

卷十六

孝友

十三 人物志

突出手不傷眾以為孝感後為

訓導其素所鑒

賞凌生學堯客遊溺於水尸不得俾偶自南贛舟旋

見浮尸來觸愴然覓棺瘞之未知何許人也歸語其

事凌父往視乃知為生縣令王公奇之為勒石記焉

歷城步教諭祀名宦

舊志皆云為勒石記歷城今續草云歷城步教諭考通志城步

名宦中無其人未詳所據

周維亮母廉氏病癱久卧床褥亮以身供枕藉晝夜踈

折隨其動息如是數載癱竟愈每食必先進母然後

餐後母壽至八十乃終

按澧屬所謂孝割股廬墓護雷乳姑哺姑靈禱致祥應耳

如此傳舊亦有思刲股及冰解鯉躍神慶等事意以爲數者不備不可謂大孝也不知虧親體傷親心爲大不孝且醫經無股肉愈病方非第嫌於獸相食也明太祖特立法以懲刲肉干旌典者至今無問愚黠猶或妄蹈之亦珥筆妄褒者之過耳其生事一無所竭死偏廬墓詐也抑當置虞至於何地付先祠於何人耶或父歿母存母歿父存又當棄一不侍養耶爲孝子親豈盡畏雷爲孝婦姑豈盡需乳且與爲口哺何不爲糜飼之至靈感誠理所有然卧冰哭竹反火息濤古人實具至誼旁觀者因此推見其孝耳真學古人者於性行不於各迹而各志紀述乃不外俚俗打喪鼓唱道情輩所艷稱亦不知苟有至誼可錄并不需此等事作觀証也若周孝子自當以待癱傳

丁源祖與父俱早喪家貧甚年四十事祖母孺母楊孝不衰天順乙卯遭大饑源自漁蘭江易米歸供高堂

直隸澧州志林

卷十六

孝友

古

人物志

饌如豐歲妻劉別採菱蕨與共食有伯母蘓亦早寡無子逃與母居孝養如一知州向子俊疏其事以聞

按天順無乙卯惟己卯大飢考知州向子俊乃正德時蒞任正德亦無乙卯惟二年丁卯澧州旱或係正德丁卯之誤或弘治八年乙卯事舊志并大飢失紀耶

楊寬字容宇事繼母有孝名撫孤姪如己子捐金全邱

氏配知州路聞之舉鄉飲

龔之吉字鹿坡鎔子孝友恬淡動中禮法博極羣書著

有蜀竹日記柏館漫錄聽江樓文集燹餘譯草母歿

鞏昌官署日方昃終身遇夕陽當戶輒掩泣兄之安

病瘵朝夕侍吮痊可乃歸寢後兄殉節德陽計聞徒步數千里收骨歸葬弟之怡皆稟其教

清 涂士佑字次侯號西澇康熙癸巳恩科舉人性孝友事繼母得其歡心歿哀甚如喪生母斷酒肉三年兄士仕年七十喪子一孫復歿欲立其次子爲嗣力勸娶妾舉一子兄卒視若己出爲文體會神理別具心得鄉里受教成材者衆雍正十二年任荆門學正歷一考辭歸刻有同門課藝

吳士升父誤墜蘭江從救俱獲免母病渴思梨不得哭直隸澧州志林

卷十六

孝友

五 人物志

禱神廟忽有貨者年七十父母具慶人比之老萊子奉例建孝子坊

賀樞字伯環家無立錐地事親甘旨未嘗缺毋早逝父衰老每冬夜必侍眠捧父足於懷以煖之年四十猶未有子星家亦斷其不嗣至四十五生男人以爲篤孝所致生平廉隅自飭嘗夜自津市歸見道旁一人挾絹數匹卧溝中呼之不應蓋沉醉者時村有虎患恐爲所噬或不肖人攫其絹乃負至家以水解之次日其人醒探囊則所藏二十餘金皆在欲四分其一

爲謝固辭曰吾若利汝金昨夜全得之溝中矣汝但
勿再醉可也其人自此戒酒歲暮輒携菓餌致饋感
再生云

韓節字瞻南生三歲父客死星沙族叔伯常爲營塋比
長不知塋處叔避吳逆兵遠徙冒險往詢屢不晤益
自悲後寇平叔歸乃得指示竝拜墓道加封樹數日
然後返旋購田爲守歲一培省母性嚴委曲承順有
怒必視顏霽乃退少撫於舅民生養卒塋報之如二
親家初貧踰壯漸饒樂施濟毫而不倦三黨多倚賴

直隸澧州志林

卷十六

孝六

其

人物志

之雍正丙午丁未歲荒疫復作里中流亡相繼爲生
者餉以粟歿者斂以棺復設義塚瘞窮旅建白骨塔
以收枯骸所餘惟急公趨義自奉甚儉素雍正三年奉
詔舉善民督撫司道州疊賜旌額年八十入卒

王孫榮饒於貲喜施濟雍正丙午丁未之荒周飢掩骼
如恐不及子王順親克承厥志有族人聖如鑿所栖
田廬售之夫婦痛哭不能徙榮令順親檢約封還不
索其價石首王某奉母逃荒澧境母歿憑中借妻子
鬻身榮家以辦塋服役一載榮欲釋之順親卽燬契

給資斧遣去後榮病順親自往城中購藥值夜誤墜清泥潭若有人掖之起得生歸父病亦愈侍養素謹後居喪水漿不入口者三日蔬食終制人咸推其仁孝余一鰲字鱗長父早逝家窘躬親負販幼弟數人皆仰給後家日饒田廬錢帛均分與弟其生平所珍藏弟未及見亦不據以自私未嘗學問能踈財愛弟鄉黨稱之

周維振字子瑞父喪弟六人俱幼躬奉母撫弟分爨口父遺及所自置田產悉給諸弟

直隸澧州志林

卷十六

孝友

十七

藝文志

附明張鏞郡學生爲澧州所千戶判股醫母有浮山詩集

清賈世昌母歿廬墓

安鄉縣

明張汝敦字淑厚嘉靖辛酉經魁力貧孝養爲舉子二十年無片刺干謁初授安仁諭未暮乞終養當道畱之乃乘傳迎侍後遷紫陽令以親老逾年竟拂衣歸俗驚榮顯每多匿喪應試斥之動援先達嘗有此若此之清貧自甘并非沽終養名者豈肯背喪以要榮乎故急表之爲勸

潘學濟字江楫邑廩生流賊執其母率族衆追之與鬪

不勝被害後賊悔釋其母還邑人傷之

清 鄒學魯學詩族敦孝友歷五世同居家政主之一人衣履惟適是用百餘載無間言康熙二十七年知縣王基鞏遴其子弟之秀各迪德者薦入庠以旌之金之章字斗文兄早逝孤姪在襁褓中鞠誨如己出家產按分給之

張舜齡字公峻邑諸生丁明季世母歿於亂強病營厝父敬吾復被賊掠去懸手足捶楚索金請代不許乞緩數刻奔家傾篋以贖乃脫子姓蕃衍因室隘讓與

直隸澧州志林

卷十六 孝友

六 人物志

昆從自遷居坊郭時渡河省父及後母有孤姪撫如己出課二子庚先明先並雋於鄉明先成進士入翰苑荷推恩封贈今祀鄉賢

新舊邑志極誇訓導羅澍之孝可祀鄉賢按身任師儒母在應迎養母不肯往應歸養奈何以寄胙能思稱孝靡盬不遑原非孝子自白之句役而陟望宦而賢勞非得已也且古人長歌當哭非所施於親喪懷沙履霜之作情無可寄耳若狸首斑然女手卷然自矜高致名教不齒久矣世俗蹈其行而異其辭支願拈髭於苦次且授梓以邀當路之品題奚翅原壤罪人哉故倪謙有贈周秩思孝詩云黥慘吟魂馳字字情可悲茲志概不錄

附 明熊一上剡臂醫母目 高洪割股醫父病 鄭衛 清劉名亮 羅必達俱反火孝親 張汝勅

廬墓 張壽先親病躬禱 羅之典讓產 熊之元
四世同慶

石門縣

梅成林母早逝事繼母三俱盡道張令旌其門 志未詳何時人

附 元馬安膝行負土成父墳廬墓三年岳志重載
為明人按負土葬親何必膝行故孔子曰中庸不可
能 邵茂雷鳴奔母墓

慈利縣

元 張杏孫母歿負土成墳里有鹿泉歲旱忽竭請之
禱沛然如初編修父之父也
杜世壽刲股醫母病

直隸澧州志林

卷十六

忠義

十九 人物志

永定縣

明 王堯商城訓導母喪廬墓三年
邵應秀割股療親

忠義

願為良臣不願為忠臣言國步多艱非所期也臣豈有
良而弗忠者哉不阿權倖不撓奸頑具覘氣節凜凜亦
不必疾風乃知勁草也然三綱易序尤仁人志士致命
之秋若慈之周該永之朱紫澧龔之安安熊義山皆殉
義如歸其他甘鼎獲者難更僕數足徵正氣常存過墟
展卷覺當年偷祿形穢萬古濺血猶芳矣亦有不避艱

險高目饑寒慷慨赴急施與不倦雖若類豪俠者之爲而勢軌時紕善類孑黎多賴保全具稟兩間浩氣未可以爲小義畧弗道也

澧州

宋 吳祿午字季亨咸淳辛未進士爲鄂州咸寧簿元

兵渡江不屈死之

岳志載平江進士咸寧尉

明 龔敬字存禮洪武乙丑辟舉授給事中立朝不肯阿附節概冰嚴時太祖繩下過刻苦口極諫言國威已振宜爲子孫留元氣觸怒貶戶部主事晉員外郎

直隸澧州志林

卷十六

忠義

三 人物志

復上疏引周秦仁暴相形上大怒謫窮塞卒

按岳志卒於官

非謫戍故能歸葬

子良甫八歲上念其忠懇賜葬同郡劉泰

爲誌其墓

龔之安字伯恭號拙菴商州知州龔錚子萬歷丙午舉人令德陽崇禎丁丑獻賊入蜀嬰城死守城破罵賊不屈遇害蜀撫傳從龍御史梁濟題贈尚寶丞祀鄉賢祠子暹陽給衣巾奉祀

毛二龔之愉皆澧南鄉民明崇禎十六年賊將馬守印陷澧二人同趙寡婦各起義兵與賊力戰相持數月

兵敗被執不屈死

劉瑄字他山崇禎庚辰進士時四郊多壘門戶成風廷對慨然及之除檢討丁內艱歸比服闋枌榆倉皇乃奉父避地甲申三月國變破指血與弟書托以終養欲自盡父泣諭止之父歿入南嶽爲僧直指李公薦之朝不出康熙三年子姪強歸澧每朔望猶北向長號其哭先帝及和瞿司馬詩爲世傳誦所著有憨園集掌園存稿筆拏古今詩選明詩刪補

熊應斗字健乾家富性豪喜施濟精岐黃術明初任楊

直隸澧州志林

卷十六

忠義

三

人物志

州府經歷告歸廣置舍宅傍容就醫病者令僮具飲食供給之全活甚衆

龔景江業岐黃值天啟時流賊四起疫大行母命製藥施療多愈後染疾愈衆村烟幾絕率僮擔藥徑至病家親爲調脗全活不下百千人時遠近爭迎足跡難遍里人爲刻像迎至家拜禱病亦愈衆神之後疫止公曰吾家本儒流不事詭異若此何以詔後人像遂毀其祠曰子聖亦通醫遇疾有難調輒中夜起立徘徊達曙求所以愈之曰吾盡吾心而已心盡疾不起

乃非藥毒之有貧乞劑者還其金曰汝愈後尚須易
肉食輔養也弟不事生產每厚恤之飲人以和雖強
暴者相接不忍犯焉

任春父紀早卒事母孝紀性好施家頗饒春繼其志歲
大饑出穀千餘石以濟賴全活者衆有負稅欲赴水
者見之代輸銀七兩不問姓名時劉六爲亂州派軍
餉一千春悉代輸不累里人州守熊公聞之當道授
七品散官

戴勝鳳號西溪幼孤有田數頃族之黠者涎之鳳躬耕
直隸澧州志林

卷十六

忠義

三 人物志

婦亦併力家益起曩枝害者反仰給焉有負債將易
妻償者鳳覺召裂其券更有接踵負而接踵貸不已
者鳳歎曰要亦我負彼耳敗之終安知非成之始乎
仍貸之嘗登岳陽樓見風濤中一艇垂危急出橐金
募衆救免其人登樓跡之鳳去久矣其自律甚莊接
人以和後四子七孫皆賢而有文萬歷時由進士累
官鴈門中丞戴君恩其冢孫也韓敬爲恩立傳以爲
漸於祖訓云

王化龍字雲從由監生授兵馬司天啟初奉使封藩粵

西轉淮北鹽運判逆璫秉政告歸暨崇禎癸未闖將馬守印陷澧謀守憲周鳳岐捐募義勇攻走之張獻忠復至偕長子一鯨率僕數十人拒賊死

胡玉成字汝用號翠珩兄弟七人齒最少出各異母特爲父所鍾愛諸兄疑父貲陰有所予玉成請概以貽兄不欲損父鳴桑之德性溫儉好學早歲游泮艱一第卒年八十有四嘗與賓飲子澥彙其詩曰過庭聞集戴君爲之傳

劉大可字暘谷有文名著有十八函嘗贊貴竹幕歸出直隸澧州志林

卷十六 忠義

三 人物志

所蓄數千金賑恤貧困招里中能文者授甲乙資以筆楮膏火成就甚衆後家徒壁立小築斗笠山下有所獲仍推解不倦

清 彭英字聖育州庠生吳逆之變大兵駐澧供億莫堪英上書當事言痛哭者八乞哀者十分其責於岳郡諸縣乃減軍需之半民困少甦辛酉孝廉彭祖訓其嗣也

疾痛呼天原非得已橫議沽名理法所黜前人憫時之急偶一陳言見錄於誌後人謬以爲所賢在此竊附交推幾不知有公庭屏跡幸而上察民隱立起沉疴尤羣攘爲力俾藉不朽豈知事卽似義且莽生平賢否迥別未可以啟俗囂囂爲錄志者行也

任維翰字雪菴州庠生性狷介能扶人緩急有旌德劉

守澧城從勦西山陣亡與櫬難返衆口枵然而
本營與劉隙者復露刃苛索生素與劉洽爲百計排
解夏泣告其同官斂貲以濟 朝廷恤典時頒爲當
事中阻乃攘袂入幕力請下逮寡婦弱息終賴以全
可謂生死交者

部鉞字掌善澧諸生家頗饒無貪吝習奉繼母如母父
歿弟鑑尚幼教愛兼篤後弟歿復鞠其孤族有貧不
能自保者爲周其急婚嫁其兒女有資堪授讀者令
與子姪同就塾鄉里之因蠅頭構釁者解囊釋之弗
直隸澧州志林

卷十六

忠義

言

人物志

計償否邑紳欲以應善良舉適鉞歿乃贈匾勗其子
曰繼善堂

王汝梅幼業賈晨起拾遺金十餘兩於水巷彼午有同
市號覓者詢其數合卽還之不分銖黍祖產無多析
種益少因概讓四弟囊所有常周人之急并不令子弟
單與乙字鉉生號月橘歲貢生賦性和厚喜施濟 國
初賊氛未靖約同志條利弊於當路差徭得平州人
高其義咸稱爲月橘先生

黃啟元府庠生康熙廿八年捐穀三百餘石周里飢 李三才父母早逝
撫弟姪成立好施濟與陳世宏張維鳳前牧俱旌報善人

安鄉縣

元 熊義山元至正萬戶二十一年倪文俊來寇執縣令張繼和去義山出死力保障黃山一縣獲安越三年文俊襲執之使降不屈文俊大怒剖其腹猶罵不絕口死 舊志作越二年誤

張貴和本縣人與兄繼和集兵捍境鄉里從義者多歸之至正二十一年倪文俊來寇戰敗死之 通志岳志載惡利人謨

明 羅于延字對之崇禎時歲貢岳志稱其死難惜事不詳清 吳起基字密菴號鯨波邑廩生非分之財不苟囊

直隸澧州志林

卷十六

忠義

三 藝文志

頗有餘遇公事無少吝兩弟早亡撫教姪若孫如已出雍正四五年大禮族有攜妻子逃者力畱之外所有延日且令種已產垂貢歿

楊正誼邑廩生擬割股醫繼母病造次作字必楷正鋤異籍雷鄰寬人稱其義俠

元 郝陽元至正間率眾拒倪文俊被執死 明羅一儒薛生崇禎時率眾禦馬賊被執死按郝與羅二人執死舊邑志或失載而新志云郝陽勅封鎮撫將軍與熊義山同祀黃山以義山之烈炳彪朝野而志歷無勅封可紀則何也 清彭友崧曾拾金還給 張之滋置義田祀祖贍族 熊之元昆季相友四代同龔撫雙寡完節 何宗太庠生好讀書嘗捐祭田輯家譜雍正丙午丁未之荒施藥瘞骸頗勤館武慶出京

修壑楊丕振母人義之

明樊以景萬歷戊子己丑邑苦水嘗出粟拯溺

慈利縣

晉 周該天門人性果烈雖不好學而率由名教叔父

級為宜都內史亦忠節士也聞譙王承立義湘州甘

卓又不附王敦之舉而書檄不至謂該曰吾嘗嫉王

敦挾陵上之心今稱兵構逆有危社稷之勢譙王宗

師之望據方州之重建旗誓眾圖襲武昌甘安南少

著勇名士馬器械當今為盛聞譙王尅期舉義此乃

烈士急病之秋吾致死之時也汝其成吾之志申款

直隸澧州志林

卷十六

忠義

人物志

於譙王乎該慨然奉命潛至湘州與丞相見口陳至

誠丞大悅會王敦遣其將魏又圍城甚急該乃與湘

州從事周琦間出反命俱為所執拷之至死不言其

故級由是得免王敦之難

明 姚士俊慈諸生崇禎十六年闖賊標將任孟二人

破澧州俊在華府冠帶死於難

伍耀孫天平所人崇禎時任福建汀州府永定縣令治

行稱最遷兵部職方司郎中歸被賊執不屈罵賊死

安福縣

明 陳乙九谿衛指揮授灞陽守備征楊應龍戰死
蔣之顯原州廩生崇禎末張獻忠屠灃負母逃匿不遑
携妻女賊退妻子兄弟俱死矣深山中覓得一三歲
姪撫成教以學顯年已六十人勸之娶生子其奇後
與姪其魁俱游泮壽九十一臨終有六孫書忠孝廉
節謙和勤謹入字遺爲家法

戴清時字晦菴原州庠生崇禎時馬賊破灃擄其父方
湖去懸拷家財克餉清時急奔代刑貲傾乃釋父壽
至九十六清時壽亦九十四乾隆舉人戴鰲其孫也

直隸灃州志林

卷十六

忠義

三

人物志

清 蔣崇申號清泉廩生生平恪謹夜被盜脇令跪大
罵不屈加以刃堅立如初盜笑釋之其子文耀亦有父風
張良玉字國泰喜施嘗往襄陽道中多流殍領資斧救之
卽世達倡修金龜橋捐李樹塔義地瘞貧骨助以棺

永定縣

明 朱紫字素先世職百戶流寇馬守應破灃紫督鄉
兵保護村里屢挫賊鋒賊憤甚悉兵攻紫力盡被執
罵不絕口碎磔而死

張勅字銜飛世職百戶偕朱紫拒賊遭擒與父可達同被害

楊顯第字甲楚衛庠生避賊山谷被搜獲臨之以兵抗
詞不屈遂遇害

胡自讓字公牧弟自滌字首茂俱衛廩生淹貫經史行
文若珠分濺讓性刻苦滌洒落爲詩賦揮毫立就當
事加禮有二胡之目丁亂賊執讓不屈欲羅致滌滌
遁深山俱絕粒卒

丁紀指揮丁貴子倜儻好義成化末川貴僚叛輸粟二
千石助征詔旌之衛初無學率龍道宇等呈允建設
龍復捐貲爲助得授義官

直隸澧州志林

卷十六

忠義

三

人物志

丁班

一作班

字元珍正德衛歲貢爲萍鄉令輕利重義衛

學初未設廩餼詣闕陳允始得比隆諸學

儒林

儒行一篇洵非夫子言然玩其所尚亦自不苟三代而
下程子獨稱孔明有儒者氣象觀莊周請號於無此道
而爲此服者時儒服立於魯門獨一丈夫問以國事萬
變不窮是舉國堪名儒者一人耳楊子云通天地人謂
之儒應邵云儒區也能區別古今也自後人專以博識
爲儒乃不復問其儒行墨行矣釋老熾而儒僅與之鼎

足而三幾如蜀漢之不得擬富強於魏吳孟韓既逝殊
深人慨懷澧各俗頗有溺惑故紀諸博識而能逃楊墨
者以正儒行非漫於名賢外贅此一品題也

澧州

明 徐玉成字中庸宋解元原彬後領洪武甲子鄉薦
任義寧學訓歷五河永川教諭陞郢府長史學行純
篤兼通詩易禮記年九十餘卒其五世孫環綿州判
官世濟清苦

任邦彥嘉靖戊子舉人知長寧縣治行循良割贖產與
直隸澧州志林

卷十六

儒林

三
人物志

昆弟家族稱孝孫灝亦領鄉薦

清 李喆字且菴府學貢生父陷獄家資非饒調護甘
旨無缺諸弟姪有所需視囊有無未嘗爲一已計日
事吟討每試輒冠軍岳陽名士咸相引重鄉里之受
教成材者甚多

劉淑麟字瑞野州廩生爲人廉謹不妄視不苟取朋友
有過輒面斥之叔父呂畿艱嗣息欲以萬金產立淑
麟爲後辭焉叔乃娶妾得生子

安鄉縣

明 羅應奎字文象嘉靖貢生歷廬江洪雅司鐸一言
一動必則古人卒祀名宦

劉岐鳳字文瑞嘉靖貢生在汶川縣訓茂州志載其甘
貧重義署州學而諸生服攝縣事而百姓稱

清 周之謨字丕顯母早歿事父暨繼母無忤於書無
不覽康熙九年以貢生廷試冠三楚授江陵訓茅屋
糲食不異家居致仕猶不釋卷壽八十四著有憨園
集

安福縣

直隸澧州志林

卷十六

儒林

三

人物志

黃箎字本和性恬恪老不倦學所讀皆手抄與人言必
依孝弟多所造就邑志未註
何時人

清 黃宏璿字禹初州庠生揆隸安福爲人和謹雍正
四年里人以孝友端方舉前牧敬禮之

永定縣

王鰲字載之性端嚴不苟非笑自號默齋居士事親孝
謹人有所負焚券弗索以貢生授隸川衛經歷抵任
卽告歸簡編自娛不與戶外事人稱獨行長者

文學

有疑通鑑不載文人者如屈原之文太史公稱與日月爭光而鑑不一載杜子美號詩聖若非出師一首爲王叔文所吟則姓名亦不登於簡牘矣崑山顧氏謂通鑑所重具關治道其所不載非賤文人著書各有體也子以四教文莫猶人言之無文行之不遠若之何其釋辭耶顧古者所謂文兼詩書六藝後世文人專長駢散韻調無大關聖學卽有叅訂訓詁亦止舉業捷徑拾人殘唾罕有心得然其於文則彬彬矣未可謝云君子尚醇也澧境兼湖嶺之勝舉嶺涵泓大塊文章莫富於是宜學直隸澧州志林

卷十六

文學

三

人物志

者澤蒸雲霧芳擷蕙蘭堪步屈李後塵者濟濟志備羣英誰云游夏遜於求與賜哉

澧州

唐 李羣玉字文山性曠達不樂仕進杜牧之遊澧勸赴舉一上而止唯吟咏自適大中八年裴休廉察湖南厚延致之及爲相與令狐綯薦之羣玉至京進詩三百篇延英口宣勅旨卿所進歌詩異常高雅朕已遍覽今有少錦彩噐物賜卿宜領取授弘文館校書郎未幾乞假歸後過洞庭經二妃廟因題詩褻神爲

鬼魅所惑歿於洪井詩前集三卷後集五卷俱傳世
今州牧何刊藏洛蘭官署以詔後進

宋 蘓堅字伯固選臨濮主簿遷錢塘寺丞督開西湖
與東坡唱和甚多東坡從僂耳北歸猶寄詩四首有
靈均一去楚江空灃陽蘭芷無顏色之句養直其子
也

明 毛穎字尚卿洪武丙子鄉貢署宛平縣學成祖時
在邸書瞻雲樓三字賜之歷陞保定教授數聘文簾
稱得士黔江志載學行優長士懷其德宏治進士棠
其後也著有易春秋解溪東集

直隸灃州志林

卷十六

文學

三

人物志

周道字子由嘉靖丙午舉人授武康令有異政未老乞
休里人顏其堂曰見一天姿英敏經史子集靡不漁
獵詩趨宋入唐尤工長篇有集行世

劉崇文字汝質號洞衡嘉靖辛酉舉人除廣元令轉知
蓬州爲人沉默皓首披吟不輟宦遊所至以表彰先
賢冥搜古蹟爲務書史無不淹博意所不堪未嘗疾
怒著有孟衍書衍戰國策衍千首和唐人蜀探竒夔
合紀行益昌詩文稿咸安詩文稿晚合洞衡草堂稿

爲令時觀察使按部直馳中甬進謁觀察笑曰令入詩魔矣其好吟如此

汪汝川字原之萬歷貢生博學能詩著有桑榆稿竹城畱律

龔之伊字覺先號茹溪萬歷庚戌進士知常山縣以卓薦調錢塘操益謹奔父喪歸好讀書嘗達曙不寐熟廿一史不差篇次頗溺內典著有甲寅集二遊篇苑花庵集簡全集卒年三十四

魯勲字印山嘉靖時由貢生官鴻臚寺萬歷初晉少卿

直隸澧州志林

卷十六

文學

三

人物志

善詩與公安袁伯修兄弟黃慎軒陶石簣唱酬燕邸結葡萄詩社著有翠芳館集

劉嘉善字元夫號令菴以父可訓廕官錦衣衛指揮同知性溫厚好學能詩尤精書法居官購藏書籍及古名帖圖畫歸莊課子嘯傲湖山著有澤畔詩集

胡澥字連海天啟壬戌會魁以文章名世擢行人司冊封江西陞河南督學賦性剛正忤親藩退歸刻木山莊二十餘年兵火尙棲猶手書帙吟咏不倦年八十餘卒

張居中字正衡生平薄於財雄於酒豪於詩恠於貌雅於談謔揮毫摘藻極似青蓮長吉一流家雖貧好推贍急困尤流連佳士由貢生授黃陂學博後歸里益貧艱於嗣息有婢妾數人悉遣去惟日與里中能文子弟闌珊詩酒間攜尊具就田間野叟對飲醉輒藉草熟眠年七十餘卒著有浮邱詩集

清 喻崇修字孰安號來巖明崇禎己卯舉人中順治壬辰進士文做秦漢不受時羈嘗躡歲詠自刻勵三年再校學使大驚爲著作手比捷南宮操選者奉爲

直隸澧州志林

卷十六

文學

三

人物志

科律自言四書文子無甚過八處詩藝則當與陳卧子並驅任白水知縣未久改沅州廣文卒文集頗富燬於火

于登俊字名顛號繡水順治戊戌進士嘗與喻崇修爭長文壇喻捷後益閉戶揣摩自書其齋云有志者事竟成破釜沉舟百二秦關終屬楚苦心人天不負卧薪嘗膽三千越甲可擒吳授清河令以不勝煩劇被放

龔遇暹字潔菴號玉山爲諸生杜門力學不履城市好

啟牖後進里中達者多出其門官長亦禮重之性耽山水嘗由楚南歷豫章抵閩所經歷皆有題咏吳逆之變澧舊志燬康熙二十三年奉修省志州牧朱馥齋屬以編輯備徵採與其壻彭泐東共成之今州志所據爲星源者是也艱於遇以明經終著筆撞題序評史娛言皆不傳有谷音堂詩文存

彭祖訓字佩孫號泐東康熙辛酉舉人詩文兼美駢體尤長時母舅逮繫長沙訓上連珠十則代訴撫軍得省釋任郎西學博凡十二年勤課督雖五尺童子皆得

直隸澧州志林

卷十六

文學

三五

人物志

執經於側人文以振卓陞奉化令有以詩文投者講誘不倦求文求字者無虛返而簿書頗不經意遂被劾著有拙存齋詩文海上吟燕遊草集坡吟與岳父龔遇暹共成澧志

孫學闢字西渠康熙辛卯舉人生平手不釋卷作文甚富提學董愛其才聘閱卷是科果售以祿不及親爲恨兄弟相友不干外事任京山教諭患目疾歸

龔乃愈字次韓號雲鴻乾隆丙辰進士讀書艱於記常揣摩竟夜不寐文規撫正希大士氣度謙和友有過

亦面非之不以為怨家雖饒布衣蔬食恬如也未仕
卒

吳鴻猷字書常與同學高翼字培風幼有文名猷嗜腐
遷翼嗜盲左力追心摹各極其趣甫冠受知學使者
翼任俠鏗於年猷靜正生平不一入長史門訖以明
經老

劉鴻勳字枚公可訓之孫幼讀書無雜嗜好屢試前茅
為人謙厚儉素鄉里推長者工草書神似蘓文忠以
明經司大治訓遽引歸治士思之年八十餘卒

直隸澧州志林

卷十六

文學

人物志

周濬字恭允澧庠生績學能文事繼母克孝勇於公義
于易雅承庭訓著有讀史辨志孫大鶴由選貢雋於
鄉

李承佑字克孚性端謹嘗讓產與姪里紛多藉以解博
涉羣籍有蓮溪詩草問世鴈字洞庭秋其最著也

翟啟廸字彥升號可園州廩生文不投時好能詩兼長
鐫篆屢躡場屋著有天文圖考秦漢文解可園詩集

居稽譜錄

江映湘字靈波雍正拔貢生性機警作文不甚經意而

天矯絕倫初未學詩有以詩驕之者偶一爲之能令
騷壇肯首家酷貧不喜交富貴人嘗於公安弔一士
喪旣至聞梵唄聲卽返其峭激如此

安鄉縣

宋 金南美字儀叔風采端凝博學而文登端平乙未
進士時真德秀知貢舉器重之官至翰林直學士制
誥多出其手

明 周階字伯升通春秋博洽子史永樂初以經明行
修薦因母老辭不就顏其堂曰隣德笠澤俞友立有

直隸澧州志林

卷十六

文學

三 人物志

記著井蛙遺響

羅鑑字景昂少讀書文鄉攻苦不輟正統辛酉以春秋
發解授歙縣教諭捐俸鑿山建學修書院浚井兵部
侍郎王偉以氣質剛方學具體用薦爲四川提學格
於例陞保定府教授有春秋一覽光行文集行世歙
邑建企德堂祀之入鄉賢祠

周曾字師賢周秩子成化乙酉舉人學使按試前茅有
問本科應發解者學使曰巴陵方昇安鄉周曾榜發
方昇果第一而曾第六以習經同也在崇寧知縣四

川全志載曾恭慎安詳政多可久

劉頤字克正成化丁酉舉人十歲能文才品卓犖手錄

諸史歷梁山銅梁教諭遷濱州同知卒於官

文應魯字東甫嘉靖貢生任嘉興訓改綏寧諭歸里杜

門著有志學疑義天文管窺農譜菊譜等書

畢仕和字介卿號石菴由邑庠生入國學中嘉靖辛卯

順天舉人任陝西朝邑令學宗陽明著有石菴漫稿

一貫正解

丁卯志稱其在任每祈雨輒應歷父母繼母三喪廬墓九載有黃雀食饌金鯉助祭

之祥楚志為立孝子傳祀鄉賢按三喪皆廬墓不知父與繼母曾就養墓所否黃雀金鯉云云想亦借王祥

直隸澧州志林

卷十六

文學

三

人物志

飛幕躍水故事譽之祭先而遭雀食其孝謹安在亦大不祥也查楚志新通志皆無其傳亦未載名鄉賢祠故不列於孝子

羅于陞字獻之號坡湖性敏異古籍一目可數行下雋

萬歷辛酉鄉榜授南康司李居家日製有畫舫與二

三友人遊咏在還著坡湖詩集

張應鼇字六海應鍾胞弟豪飲不羈舉業師古萬歷領

鄉薦授太和令遷池州同知著有之方集學製欸言

等書

楊春字善端以恩貢入國學成化乙酉經魁任涿州知

州性嚴明修學獎士泮池邊有枯桂一株爲之發榮
歸休與家人唱和著有鯨湖詩草四書書經聞鐸解

楊錫字君寵性穎敏工詩與華藩敬一方伯劉龍待相
友善邑中大利害慷慨言之縣令謝君呼爲白衣山
人以萬歷恩貢入南雍授秦州司馬時天水鑛賊猖
獗直指命董厥事遂禽苗民秦向得首薦尋乞歸林
下壽百歲乃終初公未仕邑庠東北隅濬池出玉圖
章一枚文曰百歲之章公比得之人以爲壽徵果驗

潘君諧字明弼工詩善草書守憲王子敬重之

未詳何
守憲字

直隸澧州志林

卷十六

文學

堯

人物志

命修邑志藁半就適王遷去未果授宜都縣訓陞江
夏學諭河南歸德州判著有雁字詩九十韻落花詩
集卒於仕

宋之軾工草書嘗以宅易紙自製筭殼筆縱書不輟吟
咏有風致邑令沈少霞造廬訪之萬歷時以歲薦授
寧鄉訓有遊瀉篇西寧稿

清 劉啟泰字泰瞻四歲而孤姿穎異連遭兵火不假
師授能自研悟作文如長江大河頃刻千萬言早食
餼艱一第康熙十三年輪貢適吳逆踞楚旣恢復例

不重薦以諸生終文人之厄如此

彭嵩年字中岳七歲能文作朗山泛湖諸韻皆極贍逸
爲人端靜康熙時歲薦廷試高等同邑張太史勸令
就選謝曰先祖稱明時高蹈予亦志在白雲矣遂歸
著四書析義尚書集解

畢雨周字南月康熙歲貢性豪放下筆興致淋漓試輒
冠軍著有韻槐閣集

楊彭年字傳人博涉羣書終日木然如不識字者名與
畢雨周相頡頏以明經老有覆瓿草數十卷

直隸澧州志林

卷十六

文學

早 人物志

楊一鞞字棣叔康熙庚午歲薦工草書文章宗諸大家
嘗推產贍宗黨督修學宮呈汰包荒協夫著有閑居
草澧遊草及白燕雁字詩

劉弘德九齡而孤克體母志苦學砥行玉兩第於成著
也雋六園等集第弘勳字小唐尤沉酣古學筆力精
卓學使屢聘以校士有南遊草吾亭羸草行世俱康
熙歲貢生其族弘宣亦有懶僮詩集

金汝臯能詩有叢桂山房集

新志列之隱逸又註屢中副榜考省府縣選舉志無

之有廻文詩詞傳于時故列之文學

熊腴字表東由拔貢中乾隆丙辰舉人好學篤行所著四書講義周易義疏有卓見未仕卒

席潛字孝繩山居嗜學有蒙城草枕上草晦麓集

孔正茂廩生有黃山紀菊園錄

周珙字象政爲諸生謙介自異遇公事無所徇撓老猶親學纂有春秋要義大易約編

慈利縣

明 張兌富問學善屬文元元統元年貢禮部至正初

中進士高等授茶陵州同知轉德州擢當塗尹有治

直隸澧州志林

卷十六

文學

聖 人物志

行徵爲翰林國史編修至正末遷辰路總管元亡歸明仍爲編修有谿堂集行世

張毅博學有詩文洪武間徵入京師命賦春鷓搏風詩

稱旨擢國子監錄陞監丞

張公亮兌子洪武戊申以秀才辟爲澧陽學訓歷陞平

江通江教諭所至有文名

永定縣

明 琴遇知字希子詩文奇峭清刻別具手眼以歲貢

司 湘潭攜稿往欲梓以問世蒞任僅三月卒無子

家僮納其稿棺中學徒惜之

補
澧州

清 周玉父生之晚先撫子名金侍養疎惰玉既授室一切引分先志惟恐病兄母佞佛孀居尤篤玉與室人張氏將順三十年無間兄既歿姪以貧鬻其二弟玉泣控贖歸資其婚鞠前收獎之

黃開宏吏員疎於財有孀姊無依迎贍及其子女嘗市易漢鎮同姓廷佐寄金三百兩未取去旋歿後子來澧還之嘗却館妓釋鬻旅有古處風

直隸澧州志林

卷十六

文學

里

人物志

嚴一賢不學有至性覘父母愛其仲兄子克謨讓己田四畝分之

龔承運庠生好施濟嘗捐粥賑里饑垂歿遺金付子傳模成夢溪橋有記

胡之先庠生重諾好施其三世壽俱登九十
畢之翰受弟畢之元孤託既分居復與同爨人義之

